

«Anc blera lavur per persvader il suveran»

Pld grischuna: Radunanza da delegads

DA GION NUTEGN STGIER / ANR

■ Il cumbat electoral saja da prender fitg serius per restar er en l'avegnir la gronda fracziun en il cussegl grond. La pld saja fitg dependenta dal sustegn da las partidas cirquitalas per avair success tar las elecziuns chantunalas. Grond interess per la radunanza da delegadas e delegads da la pld grischuna mardi saira a Cuira. Blers èn segir be vegnids per la nominaziun da *Christian Rathgeb* sco candidat per la regenza e per mussar lur bainvulientscha envers il schef dal departament da giustia, segirtad e sanadad. Er sur sia partida vegn sia lavur seria stimada ed apprezzada. Delegadas e delegads han lura er nominà l'um da 43 onns cun in ferm e lung applaus per ina reelecziun sco commember da la regenza. Il cumbat electoral haja gia cumenzà, ha ditg *Christian Rathgeb* e fin il proxim matg saja anc da persvader il suveran da sustegnair candidatas e candidats da la pld per las elecziuns dal cussegl grond e dals circuits. Er per sia reelecziun quinta mintga vusch singula, ha accentuà il liberaldemocrat. Gist en vista a las elecziuns naziunalas il 2015 haja la pld grischuna en tuts cas dad avair ina quota d'electurs pli auta che be 14%, sco tar las tschernas naziunalas dal 2011, ha ditg *Christian Rathgeb*.

Mantegnair ils spitals en las regiuns

En il futur saja sia finamira, uschenavant ch'el vegnia reelegi sco cusseglier guvernativ, da mantegnair ils spitals e quai cunzunt er



Michael Pfäffli (san.) e Thomas Bigliel han duas opiniuns quai che pertutga la taglia da baselgia per il mastergn.

FOTO G. N. STGIER

ils spitals regiunals. Ultra da quai less *Christian Rathgeb* era vegnir definitivamain tar ina soluziun quai che pertutga la finanziaziun dals spitals. In ulteriur term per el è er da tegnair en frain l'enguladitsch cun infracziun, che saja s'augmentà ferm en noss chantun, cunzunt en las regiuns periferas. *Christian Rathgeb* ha ditg che probabel saja en ils proxims onns d'augmentar il dumber da la polizia per garantir la segirtad da la populaziun. Quai che pertutga asilants spera il cusseglier guvernativ ch'il proceder giaja pli spert e saja pli pauc stentus. Cuntinuar

vul *Christian Rathgeb* dentant er cun ina politica liberala, l'emprim schliar ils problems e lura esser pertschert da la responsabladad.

In resultat stgars

Decidi han ils liberaldemocrats da noss chantun er las parolas per las proximas votaziuns dals 9 da favrer. *Michael Pfäffli*, il president chantunal da la pld, ha intimà ils preschents da refusar l'iniziativa chantunala per main taglia da baselgia per il mastergn. Senza quella sappian ils cumins-baselgias

betg cuvrir lur custs, quai er cun esser en possess da blers bajetgs. *Thomas Bigliel*, il president dals giuvens liberals dal Grischun, dentant ha cun ses votums adina pusè ditg che mintga interpresa duess voluntariamain decider da pajar taglia da baselgia u betg. Cun 37 tar 30 vuschs han delegadas e delegads decidi da refusar l'iniziativa. Refusar vul la pld grischuna er las duas iniziativas federalas cunter l'immigraziun da massa (65 na tar 5 gea) e la finanziaziun da l'abort (72 na tar 0 gea). In gea ha la pld decidi per l'infrastructura da viafier e quai cun 65:6.